



# YR HEUWR

CYLCHGRAWN MISOL EGLWYS HOREB PENRHYN-COCH  
CYFROL 2 RHIF 56  
MEHEFIN 2013

Chwe deg o flynyddoedd yn ôl ar y 29ain Mai 1953 fe lwyddodd Edmund Hillary o Seland Newydd a Sherpa Tensing Norgay o Nepal i gyrraedd copa mynydd Everest, yr uchaf yn y byd. Er bod y mynydd hwn yn bell iawn o Gymru mae'r cysylltiadau s'yn bodoli rhwng ein gwlad ag Everest bellach yn weddol adnabyddus, diolch i'r adroddiadau a welwyd ac a glywyd yn y wasg yn ddiweddar i gyd-fynd â'r dathliadau i nodi'r achlysur pwysig hwn.

Roedd yr hyn a gyflawnwyd gan Hillary a Tenzing yn gamp aruthrol, yn arbennig o gofio nad oedd safon y cyfarpar technegol a'r dillad dringo cystal â'r hyn sydd ar gael heddiw. Yn ôl un adroddiad mae'n debyg mai un o'r prif resymau dros lwyddiant taith 1953 oedd dealltwriaeth gwyddonydd y criw, Geoff Pugh, o ffisioleg ac ymarfer corff. Gwyddai Pugh, a hanai o deulu Cymraeg, fod darparu digon o ocsigen ynni a hylif i ddringwyr yn hanfodol bwysig os oeddent am lwyddo yn y nod o gyrraedd copa Everest. Erbyn heddiw wrth gwrs mae rhai pobl wedi llwyddo i gyrraedd y copa heb gymorth ocsigen cynorthwyl o gwbl.

Mae hanes dringo Everest yn hynod ddiddorol ac yn y blynyddoedd diwethaf gwelwyd cynnydd aruthrol yn y nifer o ddringwyr sy'n heidio yno bob blwyddyn, ond prin iawn mewn gwirionedd yw'r bobl sy'n llwyddo i gyrraedd copa mynydd uchaf y byd ac erys y gamp yn un aruthrol fawr.

Ond nid oes angen inni deithio i fynyddoedd yr Himalaia i ddod wyneb yn wyneb â her Mynydd Everest oherwydd o wrando ar y newyddion sylweddolwn bod rhai pobl yn ein cymdeithas yn wynebu profiadau bywyd sydd cyn heriol, os nad yn fwy heriol, na'r gamp o ddringo'r mynydd hwn.

Mae gan deulu April Jones o Fachynlleth fynydd i ddringo wrth geisio dygymod nid yn unig â'u colled ond â dirgelwch yr hyn a ddigwyddodd i'w merch fach wedi iddi gael ei chipio a'i llofruddio. Bydd gan deulu Georgia Williams o Wellington, Sir Amythig fynydd i ddringo hefyd wrth alaru am eu merch galluog a lofruddiwyd yn ystod y dyddiau diwethaf. Ac wrth wrando ar yr adroddiadau am erchyllterau sefyllfa Syria gwyddom fod yna fynydd i'w ddringo yno i geisio sicrhau diwedd i'r holl ryfela.

Mae taith bywyd y Cristion yn aml wedi cael ei chyffelybu i ddringo mynydd ac y mae sawl emynydd wedi defnyddio'r ddelwedd hon i'n hatgoffa na fyddwn fyth yn gorfod dringo'r llethrau serth ar ein pennau ein hunain.

Pan wyf ar ddiffygio,  
gweld y ffordd y faith,  
Duw sydd wedi addo  
cymorth ar y daith.

*Walcyn Wyn, 1844-1905*

Boed i bawb sy'n wynebu profiadau anodd a heriol bywyd dderbyn yn helaeth o bresenoldeb ac arweiniad yr Arglwydd.

Pob bendith

Judith

Berwynfa, Penrhyn-coch, Aberystwyth. SY23 3EW

Rhif Ffôn : 01970 820939

E-bost: [berwynfa@btinternet.com](mailto:berwynfa@btinternet.com)

**CALENDR MIS MEHEFIN 2013**

<b>Cyhoeddwr y Mis: Robert Dobson</b>	<b>Organydd y Mis : Ceris Gruffudd</b>	
2 Mehefin 2.30yp	Oedfa Gymun :Gweinidog	Bwrdd y Cymun: Mrs Mairwen Jones
9 Mehefin 10.30yb	Clwb Sul Horeb o dan arweiniad Eleri Taith i Benfforddlas. Cynhelir gwasanaeth yno am 2.00 yp	
16 Mehefin 2.30yp	Oedfa Bregeth: Gweinidog	Gofal y Te: I'w Drefnu
23 Mehefin 10.30yb	Oedfa Bregeth: Y Parchg Peter Thomas	
30 Mehefin 10.30yb	Oedfa Deuluol: Gweinidog	
Gorffennaf 1 2.30yp	Oedfa Gymun: Gweinidog	Bwrdd y Cymun: I'w drefnu.

**Ich Dyddiadur**

3 Mehefin: Cinio Cymorth Cristnogol ym Methel o dan nawdd Eglwysi San Mihangel a'r Santes Fair 12.15 – 1.30yp.

9 Mehefin: Pererindod i Benffordd-las. Cynhelir gwasanaeth yno am 2yp. Enwau i Ceris.

10 Mehefin: Encil ym Mhennant Melangell

11 Mehefin: Cylch Darllen y Beibl: Llyfr y Datguddiad Penodau 6 a 7

12 Mehefin: Cinio Cymunedol Penrhyn-coch yn Neuadd yr Eglwys

12-13 Mehefin: Cyfarfodydd Blynyddol Undeb Bedyddwyr Cymru yn y Llwyfan, Caerfyrddin.

15 Mehefin: Taith Cymdeithas y Penrhyn i Dreffynnon a'r ardal. Enwau i Ceris

19 Mehefin: Cymdeithas Bethel. Ymweliad â Ffair-rhos

26 Mehefin: Cinio Cymunedol Penrhyn-coch yn Neuadd yr Eglwys

17 Gorffennaf: Cyfarfod Diaconiaid Horeb am 7yh

19 Gorffennaf: Barbeciw Horeb yn Stablau Sian am 6yh.

22 Medi: Oedfa Menter Gobaith yng Nghapel Carmel, Llanilar am 10.00yb

25 Medi: Cyfarfod Diaconiaid Bethel a Horeb yn Horeb am 7yh.

2 Hydref: Cyfarfod Diolchgarwch Horeb am 7yh

**Lloffion:**

**Dymuniadau Gorau** i Mrs Margaret Griffiths a dorrodd ei braich yn ddiweddar.

**Diolch yn fawr iawn** i blant y Clwb Sul a oedd wedi cymryd rhan yn y Gymanfa Ganu yng Nghapel y Morfa ym mis Mai.

**Diwrnod o Encil ym Mhennant Melangell:** Cynhelir yr encil yng Nghanolfan Pennant Melangell ar ddydd Llun, 10fed Mehefin. Dyma fydd trefn y diwrnod yn fras: 9.00yb: Gadael Penrhyn-coch; 10.30yb: Cyrraedd a Choffi; 11.00yb: Myfyrdod Gweddïgar 1; 12.00yp: Gwasanaeth yn yr Eglwys a chyfle i edrych o gwmpas a Chinio; 2.00yp: Myfyrdod Gweddïgar 2; 3.00yp: Te a Chacen cyn ymadael. Rhowch wybod i'r Gweinidog os hoffech ymuno â ni. Cost y diwrnod fydd £10.